

第八冊

卷之十 人物志

忠孝 事功 文行

散材 列女

卷之十一 外志

流寓 仙釋
藝術 祥異

朔平府志 辛

朔平府志卷之十

人物志

忠孝

事功

文行

散材

列女

歷覽從來郡邑志其志人物恒以入祠從祀者則名之曰鄉賢其不入祠者則另標名目而不敢以賢稱不知祀典之失實也久矣鄉之賢將以其人而賢之乎抑僅以其祀乎如以祀者爲賢則未祀者舉皆不賢乎要未可爲定論也朔郡所屬右玉左雲從前衛治原有祀於學宮者大率非其鄉之產不知何以借光俎豆至平魯祀典闕焉無聞而朔州馬邑舊志所

列鄉賢頗多遺漏總之拘於從祀也故余編次人物
不論入祠與否而總區爲三類首忠孝立德也次事
功立功也次文行立言而兼立德也三不朽備卽不
言鄉賢而鄉賢於是乎畢該矣至其人曾列名史策
不應與草木同腐然或乘時竊位而片善無稱或才
本雄豪而大節有玷則名之曰散材猶大木之不中
繩墨也而末殿之以列女者蓋巾幗而鬚眉固人物
之閏餘而亦無成代終之義云爾

忠孝

五倫以忠爲首百行以孝爲先世未有不忠不孝而
他端足錄者也亦未有能忠能孝而遺行可議者也
故一言忠孝而衆善皆備矣孔子曰社金革死而不
厭北方之強也朔郡人物多疆場死事之臣果風氣
使然乎不知匹夫逞私忿好勇鬪狠等性命於鴻毛
此風氣爲之也若夫執干戈衛社稷捐軀斷脰臨大
節而不奪此非至大至剛氣足以配道義者其孰能
之至於委巷小民目不睹詩書耳不聞道德而誠孝
所感足以動天地驚鬼神如冬月之葭裹足之經入

室之雉豈人力所能致哉然則富厚福澤不必傳而傳者反在蒙難艱貞之士王公大人有時朽而不朽者乃在餒粟飲水之人君子觀此宜知所以自處矣

晉

劉

殷

字長盛新興郡人高祖陵漢光祿大夫殷七歲喪父哀毀過禮服喪三年未嘗見齒曾祖

母王氏盛冬思堇殷時年九歲乃於澤中慟哭忽若有人云止聲殷收淚視地便有堇生焉又嘗夜夢人謂之曰西籬下有粟寤而掘之得粟十五鍾時人嘉其孝感弱冠博通經史有濟世志州郡屢徵不起齊王攸征南將軍羊祜辟召皆以疾辭同郡張宣子勸之就召殷曰王母在堂應命便不得就養宣子曰識量如子當爲吾師以女妻之及王氏卒殷夫婦毀瘠後有二白鳩巢其庭樹自是名

譽日著太傅楊駿禮聘殷以母老固辭趙王倫篡位以散騎常侍徵之殷逃奔雁門及齊王冏輔政辟爲大司馬軍咨祭酒旣至拜新興太守有七子五子各授一經一子授史記一子授漢書一門之內七業俱興北州之學獨盛殷後以壽終

元魏

于什門

雲西人仕魏明元忠梗不撓爲時所稱馮跋數侵擾魏邊明元遣什門諭之跋崛強什門反覆陳說聲色俱厲跋怒執而拘之時久衣裳敝壞跋遺以鮮好之服冀動其心什門拒不受被留二十四年後馮弘上表稱臣乃送什門還拜侍御史太武嗟嘆不已比之蘇武

朱長生

朔州人魏孝文時爲員外散騎常侍奉使高車同郡于提爲副至則高車王阿伏至羅欲

降二人以兵脅之長生與提厲聲曰我生爲魏臣死亦魏鬼寧烈士肯畏死耶至羅舍之而拘留三

年始放還孝文嘉其節拜長生河內太守提隴西太守並錫爵爲男

唐

烽

子

豐州人永泰初暮出爲黨項掠去與西蕃易馬蕃將令穴肩骨貫以皮索配馬數百蹄與

之牧經半載馬蕃息蕃將賞以羊革數百因轉近牙帳贊普子愛其了事遂令執纛左右有剩肉餘酪與之又居半年因與酪肉悲泣不食贊普問之云有老母頻夜夢見贊普憐之夜召帳中語曰蕃法嚴無放還劍與爾馬有力者兩匹間道縱爾歸母言我也烽子得馬俱乏死遂晝潛夜走數日爲刺傷足倒磧中忽有風吹物窻窳過其前因攬之裹其足有頃不復痛試其步走如故經信宿及豐州界歸家母尚存悲且喜曰自失爾我惟念金剛經寢食不廢以祈見爾今果如願因取經拜之縫斷處亡數幅不知其由子因道磧中傷足事母令解足視之所裹瘡物乃數幅經也其瘡亦愈

後五代

周德威

朔州馬邑人字鎮遠小字陽五爲人勇而多智能望塵知敵數狀貌雄偉笑不改容事晉

王李克用爲騎將從破王行瑜以勦遷內衛指揮使繼而擒梁將陳夜叉破夾寨解潞州之圍從莊宗救趙大敗梁軍於栢鄉梁將王景仁以十餘騎僅免劉守光僭號於燕晉遣德威將兵五萬圍幽州擒其守將單廷珪累功遷代州刺史振武節度莊宗勇而好戰德威老將常務持重以挫人之鋒天祐十五年將燕兵三萬人從莊宗於河上從麻家渡進軍臨濮以趨汴州軍宿胡柳陂德威請按軍無動以逸待勞莊宗不聽遽督軍而出率銀鎗軍馳入梁陣梁軍小敗犯晉輜重輜重見梁朱旗皆驚走入德威軍德威軍亂梁軍乘之德威父子皆戰死莊宗與諸將相擁而哭曰吾不聽老將之言使其父子至此及卽位贈太師明宗加贈太尉晉高祖遷葬燕王子光輔官至刺史

董重進

振武人晉王李克用破朔州得之賜姓名李存進從破黃巢爲義兒軍事莊宗從戰河上

舟兵來往頗以爲勞存進乃以葦竿維大艦爲浮橋莊宗大喜解衣賜之以功遷振武節度晉討張文禮於鎮州以存進爲招討軍於東垣渡東垣土惡築壘不能就存進伐木爲柵文禮子處球以兵千餘逼柵存進出戰橋上殺其兵殆盡而存進亦歿於陣追贈太尉

史彥超

雲中人勇悍驍捷仕周爲虎捷都指揮戍晉州漢劉旻攻晉州彥超戍兵堅守以功遷龍

捷右廂都指揮周漢戰高平彥超爲先鋒先登陷陣拜感德軍節度周兵圍太原契丹出忻代以救漢彥超爲先鋒戰忻口勇憤俱發左右馳擊解而復合遂歿於陣世宗贈太師優卹其家

金

張升

雲西人爲絳州錄事趙偉反時謂相識者曰吾誼不能從言訖赴水而死

完顏陳和尚

名彝字良佐以小字行豐州人系出蕭王諸孫年二十餘爲元兵所掠太師甚

愛之置帳下時母留豐州從兄安平都尉斜烈事之甚謹陳和尚在元歲餘托以省母乞還太師以卒監之至豐乃與斜烈刼殺監卒奪馬奉母南奔元兵覺合騎追之由他路得免旣而失馬母老不能行載以鹿角車兄弟共挽南渡河宣宗奇之斜烈以世官授都統陳和尚試補護衛未幾轉奉御斜烈行壽泗元帥府事奏陳和尚自隨詔以克宣差提控佩金符陳和尚天資高朗雅好文史自居禁衛日人以秀才目之踰年轉忠孝軍提控五年元兵入太昌原平章合達問誰可爲前鋒者和尚出應命先已沐浴更衣若將就木裨者環甲上馬不反顧是日以四百騎破八千衆奏功第一手詔褒諭授定遠大將軍九年正月三峰山之敗走鈞州城破元兵入卽縱兵巷戰陳和尚趨避隱處殺掠稍定乃出自言曰我金國大將欲見白事兵士以數騎夾之詣行帳問其姓名曰我忠孝軍總領

陳和尚也太昌原之勝者我也衛州之勝亦我也
倒回谷之勝亦我也我死亂軍中人將謂我負國
家今日明白死天下必有知我者元兵欲其降砍
足脛折不爲屈割口吻至耳噴血而呼至死不絕
大將義之酬以馬潼祝曰好勇子他日再生當令
我得之時年四十一詔贈鎮南軍節度使塑像褒
忠廟

楊沃衍

朔州人少時爲北邊屯田吏未有所知名以
事謁宣宗奇之擢武州刺史沃衍屢建奇勳

累官元帥左監軍中都留守兵敗於元曰我金之
重臣祚衰國危不能揀豈肯貪生苟免以覩顏人
世乎與烏古論黑漢俱死節

明

吳

順

先世江右撫州臨川人本姓雷壻於吳從其
姓父添祥遣戍朔州衛生順字孟高性淳謹

不事表暴母氏早逝家且窘順肩薪爲業奉父益謹積三十餘年靡不曲盡始終未嘗一日少怠添祥邁疾七晝夜後彷徨不能得順舐穀道糞卒出又患瀉痢順聞糞苦可治夜禱北辰取嘗糞苦澁求醫少間添祥思雉臙時三月忽雉飛入其家捕烹食之遂愈壽九十一卒葬八里原順廬墓側年已七十矣鹽醬不入口負土封塋朝夕悲慟不衰數日復有慈烏百數飛翔繞墓哀鳴之異順之與人也不以炎而附寒而棄每令其嗣灝習諸藥試奇疾人多德之正統十四年詔旌九十賜爵一級年將百歲而卒

楊清澄

雲內人過歲父卒母邵氏窘甚爲人縫紉取粟相哺清澄五歲問其母索父母泣曰爾父

在我安得貧苦至此携之墓所清澄悲號而拜竟日呱呱泣不絕聲稍長力養其母曰我生不能奉父庶幾竭力以事母百年無恙遂絕口葷肉酒醴以祈母永年母病篤割左膊肉爲羹食之旋愈壽

躋八十一夕母憂其父曰兒孝爾乃享其遐齡後三年此月日當隨我去矣如期卒

黑能

原任大同軍旗屢立戰功歷陞指揮僉事調任寧夏安邊營天順年間北兵深入衆多披

靡能奮勇爭先摧鋒陷陣力戰陣亡明詔優卹贈指揮同知子黑鑑世襲能職於成化年調任平魯衛指揮同知入籍平魯子孫蕃衍

孫祥

右衛人景泰辛未進士由給事中歷官都御史殉節邊關子紳錄由蔭生爲大理寺評事

畢清

威遠衛人嘉靖二十年選貢任浙江慈谿縣主簿有政績值倭寇入境清率土兵剿殺賊

麋至援絕力盡罵賊不屈而死事聞贈太僕寺寺丞廕一子入監子孫永免二丁仍勅建祠於城北街

李瑾

右衛人性好友勇而有智嘉靖初爲中路叅將敵寇西路馳兵赴之臨機勇果有古名將

風歷陞大同總兵勞不偏安貧不殖貨嘗與士卒共甘苦其部將戰死者設壇躬祭傷者爲傳藥勸懇撫之至於追寇失期烽堠失警者法不少貸以故鎮兵多怨適舊將朱振陰搆鎮兵作亂舉炮登門矢盡與弟珙同及於難士民惜之

李桂

右衛人爲遊擊將軍嘉靖癸丑戎騎入境桂率所部與戰於八角城豆兒梁從辰至酉桂軍罷救兵不至桂愈慰勞士卒轉戰至窪兒上力竭爲賊所殺事聞贈都督僉事賜祭六壇蔭一子指揮

周繼謨

右衛貢生任遼東自在州知州死難

馬

璠

右衛指揮舍人性至孝父祿行商蘇州歿於旅舍璠欲取父屍母以年幼不許璠曰父死不葬何以自立天地間遂自縊以殉繩忽斷甦中聞人語曰汝自去保汝無妨後與兄璋親負父屍

還葬終身養母無懈

陳宗堯

左衛人嘉靖丁巳年父陳定妻祁氏被外兵搶擄八月餘知定死虜地宗堯乘空化屍還

葬撫按上其事欽賜賞賚以旌之

孫文

朔州歲貢以廬墓稱孝父卒廬三年母亦如之授寧夏中衛訓導有司以聞旌其閭

邵定

左衛人任三關遊擊會戎騎大舉入寇定領兵截殺日暮入草垛山堡被圍四日水絕食

盡笑圍而出身被刀死

麻富

右衛人總兵麻祿次子年方弱冠從父於戎深入寇圍百戰不克卒死於難

麻登雲

右衛人父麻剛患寒疾醫曰糞甘易愈登雲嘗之覺苦哭赴城隍廟禱以身代父思肉食

割股煎湯以奉之疾遂愈

林

椿

字永年其先東安人始祖成大同右衛世以武功顯椿累官大同副總兵嘉靖二十九年俺答從小鶯圪塔入塞椿與總兵張達同心協力奮不顧身擊敵於彌陀山聞達被圍不介馬而馳至桃坡墩奮勇直入手刃射死勅兵不知其數自已至申矢盡勢孤爲流矢所傷事聞贈光祿大夫都督同知謚忠愍立祠祀之獻徵錄曰椿知兵與士卒同甘苦卻軍士暮夜之金拒子侄禦寒之酒尤孝友重倫常每祀必先齋戒獨宿事母每食必親薦母或不與食已卽廢食處兄弟敦睦訓子侄慈以義每提兵出戰必拜別母若永訣意洵忠孝兩全者矣

李

梅

先世湖廣石首人始祖李雲於洪武癸卯年歸附至曾祖李忠於成化十六年在威寧海子韓家庄與賊力戰功陞平魯衛指揮同知十七年紅牆兒斬首一顆陞指揮使祖鎮父璟皆世襲傳至梅中式武舉歷任東陽河新平堡守備山西遊擊將軍嘉靖二十七年大同出邊深入危地兵

部題陞都指揮使二十九年充左叅將分守陝西
延綏三十一年充副總兵三十二年與戎騎遇於
雙山堡馬家梁見勢甚盛誓衆曰看此將南下勢
甚猖獗今我以孤軍若不鬪於萬死中無以報國
挺戈出入賊陣軍士感激奮殺無不一當百奈兵
寡漸盡梅身集矢如蝟中十餘鎗而歿詔贈后府
左都督長男承襲祖職外仍蔭一子李繼勲指揮
僉事賜祭葬謚忠愍

何廷魁

威遠衛人萬曆辛丑進士初任寧晉知縣後
陞知府遼東副使城陷死於難舉家皆歿廷

魁兩爲邑令俱稱循良三知名郡皆有聲譽丰標
卓犖直節大著及歿賜葬賜謚與高張並祀晉陽
三忠祠

朱

纓

平魯衛人萬曆三十七年歲貢初任陝西咸
陽縣縣丞陞遼東左衛經歷殉城盡節明旨

褒贈崇祀鄉賢